

# «Өнерлі команда» атанды

Талдықорған қаласында, ішкі істер органдары қызметкерлерінің арасындағы жыл сайынғы «Парасатты полицей» республикалық байқауы өтті. Төртін сақшыларының мемлекеттік тілге деген құрметін және құқықтық мәдениетін, ізгілік пен парасаттылық рухын арттыруды мақсат еткен байқауға полиция майоры Теміржан Баймағановтың басшылығымен Шырақбек Қабылбаев атындағы Қостанай академиясының «Қабылбаев ұрпақтары» командасы да қатысып келді.

Республикалық сайыста республикалық маңызға ие қалалардың, облыстық ішкі істер департаменттерінің, ведомстволық жоғары оқу орындарының 21 құрама командасы өз бақтарын сынады.

Конкурстың «Таныстыру» деп аталатын 1-кезеңінде командалар ішкі істер органдарында қызмет етудің мәртебесін, жұмыстарының ерекшеліктерін және қызметте қазақ тілін қолданудағы жетістіктерін ерекшелік отырып өздерін таныстырса «Сәлем, Астана!» атты 2-кезеңде Астана қаласының 20 жылдық мерейтойын ескере отырып, Астана қаласының басты ерекшеліктерін, оның басқа қалалар арасындағы орнын, жетістіктерін сахналық көрініс арқылы көрсетті. Ал «Көркемсөз сайысы» деп аталатын 3-кезеңде команданың бір мүшесі қазақ ақындарының Қазақстан, Астана, қазақ тілі тақырыптарында жазған бір өлеңін мәнерлеп оқыды.

Мұндайда жүзден жүйрік,



мыңнан тұлпары ғана суырылып алға шығады емес пе?! Сайысқа сақ қарап, қара қылды қақ жаруға бел буған қазақтың дүлдүл айтыскер ақыны Балғымбек Имашев бастаған әділ қазылар алқасының шешімімен:

Бас жүлдеге Солтүстік Қазақстан облысы ІІД-нің «15-ші өңір» командасы лайық деп танылса, 1-орынды Шымкент қаласының «Мегаполис» командасы иеленді. 2-орынды Қостанай облысы ІІД-нің «Қостанай қырандары» командасы мен Маңғыстау облысы ІІД-нің «Каспий» командасы өзара бөлісті. Ал 3-орынды Ақмола облысы ІІД-нің «Көкше сақшылары» командасы мен Көліктегі ІІД-нің «Көлік сақшылары» командалары иеленді.

Сонымен қатар, байқауда бірқатар аталымдар сарапқа салынып, «Өнерлі команда» номинациясына лайық деп танылған Қостанай академиясының «Қабылбаев ұрпақтары» командасы Қазақстан Республикасы Ішкі істер министрлігінің дипломымен

марапатталды.

9-шы рет ұйымдастырылған осы «Парасатты полицей» байқауының салтанатты жабылуында Ішкі істер министрінің орынбасары полиция генерал-майоры Берік Бейсенқұлов байқауға қатысушыларға алғыс білдіріп, барша жеңімпаздарды құттықтап, арнайы дипломдар мен бағалы сыйлықтар тапсырды.

«Өнерлі команда» номинациясымен оралған «Қабылбаев ұрпақтары» командасын Академия бастығы, полиция генерал-майоры Мирлан Қызылов қабылдап, сайдың тасындай іріктелген 21 команданың ішінде «ең шығармашыл команда» атанудың оңай еместігіне, осымен тоқтап қалуға болмайтынына, одан әрі іздене түсу қажеттігіне тоқталды.

**Құрбанәлі ЕЛМҰРАТОВ,  
ҚР ІІМ Шырақбек  
Қабылбаев атындағы  
Қостанай академиясының  
мемлекеттік тіл бөлімше-  
сінің бастығы**

Халқымыздың қуанышын, мұңын да,  
Жанашыр боп жалықпастан жыр еткен.

*Болмысынан қазақилық тараған,  
Хабардар ғып, бізді әрбір саладан.  
Тынысына, жұмысына дем беріп,  
Ел мүддесін, тілек сырын ұға алған.*

*Ұстанымы, қадамы һәм жолы нық,  
Жаңа мазмұн жанрлармен толығып.  
Мұңын мұңдап, жоғын жоқтап елінің,  
Шығып жатыр қажыр-қайрат танытып.*

*Кел, қазағым, өз тіліңмен сусында  
Айың оңнан, күнің солдан туғанда.  
Жылдан-жылға кеңеюде өрісі,  
Рухани жаңғырумен бір алға.*

*Өз тіліңе қамқор болу борышың,  
Қостанайым – ата-баба қонысың.  
Қанат жайып өз газетің, өз тілің,  
Алаш жұрты беретік біз қол ұшың!*

**Елемес СЕРІКБАЕВ,  
Рудный қаласы,  
Қашар кенті.**

## САЛАМАТТЫ ҰЛТ

### "Таза қол" акциясы

#### Мұрат ЖҮНІСҰЛЫ

Арқалықта қалалық қоғамдық денсаулық сақтау басқармасы мен Ұлттық сараптама орталығы филиалы білім ошақтарында «Таза қол» акциясын өткізуде.

Аталған денсаулық сақтау мекемелерінің кезекті шарасы қаладағы А.Құнанбаев атындағы № 6 мектептің шағын орталығында өтті.

– Акцияның мақсаты – жіті ішек инфекцияларының алдын алу және жеке бас гигиена ережелерін сақтау дағдыларын үйрету болып табылады.

Шара барысында шағын орталықтың қызметкерлерімен дезинфекциялық режимді және жеке бас гигиенасын сақтаудың маңыздылығы туралы әңгіме жүргізілді, сонымен қатар сыртқы орта объектілерінен ішек таяқшасы тобының бактерияларының болуына шайындылар алынды.

Зертханалық зерттеу нәтижелері бойынша алынған шайындылардан ішек таяқшасы тобының бактериялары табылған жоқ, – дейді қалалық қоғамдық денсаулық сақтау басқармасының жетекші маманы Ержан Өткелбаев.

Арқалық қаласы.